

忠

節

錄

忠節錄卷之三

燕府長史葛誠

葛誠未詳何許人以進士爲燕府長史靖難師未起時

文皇使誠入奏事覘朝廷所爲建文君密問燕府事誠具以實告建文君乃遣誠還燕使爲內應靖難師將起誠切諫不聽及詔讓燕

文皇稱病盛夏擁火猶自謂寒甚張昺等入問疾誠密言王無恙以不得上心故宜爲備誠

又密疏以聞會燕人奏事京師執下獄得燕
謀蹤跡卽發符逮燕府官校又令曷等發兵
內應盡簿錄府中人

文皇大恨殺誠夷其族

寧府長史石楔

石楔山西平定州人洪武中爲寧府長史靖
難師至所過郡縣皆下楔在大寧獨欲爲守
備計及北師攻拔大寧執楔終不屈遂支解
而死

晉府長史龍鐔

龍鐔字德剛江西萬載人洪武十七年貢爲國子生授浙江按察司副使以微累降長洲知縣尋陞晉府長史建文中靖難師起徵兵於晉鐔以大義不可靖難後詔械鐔至不屈死之有收其遺骨得所自書贊云

谷府長史劉璟

劉璟字仲璟文成公基子也沉涵經傳喜談兵究極韜略握奇諸書偉貌豐髯議論英發

甌賊葉丁香叛延安侯唐勝宗討之決策于
璟破賊還薦璟才略

高皇喜曰璟真伯溫兒矣召見謂曰朕欲汝日
夕左右考宋紀惟閣門使立百官上以宣達
爲職處爾無逾此官者遂授之以剛直聞會
谷王就封

上謂侍臣曰谷王年少誰可羽翼王者諸大臣
故忌璟對曰閣門使劉璟忠勇果敢可任乃
授谷府長史谷邸在宣府璟設險足兵諸胡

屏息嘗至燕

文皇與璟奕璟勝

文皇曰卿獨不少讓我耶璟正色曰可讓則讓
不可讓璟不敢讓也靖難兵起璟馳還京獻
十六策不聽令叅李景隆軍事景隆又不聽
景隆戰敗璟夜半渡蘆溝河水陷馬斃璟力
跳躋岸冒雪走良鄉趾爲之裂跛行三十里
璟子豹自大同赴難越良鄉至涿州遇璟翼
璟上馬奔還家養疾後輿疾赴闕進聞見錄

千萬言又不聽令璟還家以俟

文皇卽位召璟稱疾不至乃以逃叛親王罪逮
至京入見侃侃不屈但稱殿下且云殿下百
世後逃不得一箇字 詔下獄自經死法官
希旨緣坐其家

上以文成故不許乃得歸葬嘉靖間提學副使
萬潮肖像配享文成祠

遼府長史程通

程通字彥亨徽州績溪人祖平業儒洪武初

謫戍延安有同謫而旅死者平遣子以誠負
遺骸歸其家其家以貧故不納乃買地葬之
通少有至性嗜學執禮洪武乙丑通以縣學
生應貢入太學父以誠死嶺南通徒步扶櫬
歸葬廬墓哀毀至妻子不能識戊辰復上太
學時平戍延安年已大耄通上書言臣壯而
無父祖猶父也臣祖老而無子孫猶子也祖
孫更相爲命願代其役辭極哀懇

高皇憐之而持其章不下陰召平至并召通東

西立

高皇指平顧通曰汝識此人否于是祖孫相持而泣哽咽不能仰視

高皇嗟歎良久命兵部除其籍驛送平還鄉庚午通舉應天府鄉試時遣諸王將兵行邊以封建策諸貢士于廷獨通對稱旨置第一除遼府紀善辛未從王閱武臨清壬申從王之國遼西建文初北兵起從王渡海來朝進左長史從王之國荊州悉心輔導王敬禮之凡

國事必咨焉府中衛士紀綱者以狡佞幸于
王通屢笞戒之建文君遣人至荊州通上封
事乞防禦北兵數千言

文皇卽位綱入賀畱侍爲錦衣衛指揮使數被
顧問乘間言通曩有封事指斥乃詔械通至
庾死獄中家屬發戍極邊簿錄其家得田數
十畝遺書數百卷牯皮數張績溪之程最衆
幸使者仁恕不芴及

秦府長史鄒朴 鄒朴

鄒朴字爾愚江西吉安永豐人建文初以儒官仕周府直言極諫沮其邪謀王不聽嚴刑禁錮甚密王逆謀覺大臣以朴諫疏聞建文君嘉其忠義召至京具言始末特陞監察御史尋陞秦府長史歸省聞鄒瑾死憤激不食而卒時人謂瑾朴永豐連璧云

燕府伴讀余逢辰

余逢辰字彥章寧國宣城人爲燕府伴讀靖難兵未起逢辰頗聞其謀遺書示子自分必

死及起兵逢辰泣諫死之

浙江提刑按察使王良

王良字天性河南祥符人歷官刑部左侍郎
建文中坐問燕國人罪輕左遷浙江按察使
至浙謁岳鄂王墓誓曰苟媿武穆非人也壬
午聞靖難師克誓以必死慟哭不已會命使
召良良執使者將斬以徇爲衆刼去良乃集
諸司印凡九携歸私第嗟歎者久之妻問故
良曰吾分應死顧思所以處汝未決耳妻曰

我何難君爲男子乃爲婦人謀乎遂命妾饋
良食抱其子歔歔如廁置子池傍自投池死
良久往覓之子匍匐池畔頃之屍浮起良殯
殮畢卽列薪於戶寫遺囑付家人令妾抱幼
子往匿某僉事家以宗祀爲托或曰托諸汴
商遂舉火抱印闔室同赴火死事聞

文皇曰死自其分朝廷印信良擅毀不得無罪
詔徙其家于邊已而風雨晦冥人或見其出
沒台人陳璘私識良死事每談及流涕沾襟

正德間按察使梁材提學副使劉瑞改公署
東水鑑亭爲祠祀良

四川按察使李文敏

李文敏山西蔚州人監生爲監察御史陞四
川按察使永樂間以奸黨論死

河南布政使司參政鄭居貞

鄭居貞徽州人豐頰美髯從父潛官閩中師
貢師泰洪武中舉明經授鞏昌通判陞禮部
郎中文行爲時所重二十三年進河南叅政

永樂初坐方黨論死初孝孺之教授漢中也
居貞以詩送之曰翩翩紫鳳雛羽翮備五采
徘徊千仞翔餘音散江海於焉覽德輝濟濟
鏘環珮天門何差我羣仙久相待晨沐晞朝
陽夜息飲沆瀣如何復西飛去去秦關外岐
山諒匪遙琢食良自愛終當巢阿閣庶以鳴
昭代孝孺亦贈之文謂其叅政河南三年而
去吏民以不能畱爲憾云

江西按察副使程本立

程本立字原道系出伊川上世徙杭再徙崇
德今析桐鄉本立少有大志讀書不務章句
與海鹽沈壽康友善壽康喪父母葬祭以禮
敦行誼南臺論薦與官力辭不就鄉人稱爲
孝隱先生嘗謂本立曰世之學者爭務科舉
以經學爲名而無實吾所不取子之質近厚
年且富當志於聖學本立由是篤志爲已聞
金華朱彥修兄弟得考亭正傳于白雲許謙
往就學焉寓婺最久造詣日深洪武丙辰舉

明經秀才擢秦府引禮舍人召見奉天門賜
楮幣鞍馬母艱去官服除補周府禮官從王
之國大梁丁卯從主入覲以府事累謫雲南
馬龍他郎甸長官司吏目畱家大梁以一僕
從之任時所部內附未久煽動爲憂本立單
騎深入夷巢開諭以順逆利害諸酋落咸感
悅歸順已而餘孽尚驕西平侯沐英布政使
張統聞本立賢皆禮重之委以統領守禦本
立深憫民夷之患矢捐一身以救一方且撫

且禦山行野宿不避艱險自楚雄姚安抵大理永昌鶴慶麗江往來綏輯由是軍民安業本立之功爲多戊寅奏計京師學士董倫應天府尹向寶交章薦其文學治行宜畱中朝徵入翰林充纂脩官脩

太祖實錄尋陞署左僉都御史本立作御史箴以自勵俸入之外不通餽謁辛巳以誤失陪祀當調特畱史館供職如故明年實錄完出爲江西按察副使未行北師已渡江本立知

事不競悲憤自縊死壬午六月十三日也後

三日

文皇卽位詔追奪本立恩典家無遺貲所著有
異隱集若干卷郡人吳昂官福建僉事刻布
之邑人祀本立於鄉賢祠

北平按察僉事湯宗

湯宗未詳何許人爲北平按察僉事上言北
平按察使陳瑛密受王府金錢有異謀逮瑛
謫廣西靖難後召瑛還窮治建文諸臣多坐

夷滅恨宗尤甚捕至宗死之

陝西按察僉事林嘉猷

林嘉猷名昇以字行浙江臨海人師同邑王琦琦坐累徙雲南族姻無敢顧者嘉猷徒步千里追送泣別人高其誼後與鄭叔貞負笈六千里至漢中師方孝孺時學於方氏之門者踵接而孝孺獨以得二人爲喜曰匡我者二子也洪武末以儒士校文四川建文初薦

修

高廟實錄入史館爲編修遷陝西按察僉事嘗
被召入燕邸得其隱知二郡王素傾世子以
告孝孺孝孺言之建文君遣錦衣千戶張安
持書詣燕許世子王燕燕內使黃儼因問世
子計且得行世子竟先發事遂洩靖難後坐
方黨逮至京死之

山東按察僉事胡子義

胡子義一名志遠刑部侍郎子昭弟也薦辟
爲威遠訓導歷蜀府典寶山東按察僉事聞

兄子昭死避世丹稜蜀獻王聞而憐之令削髮爲僧子義以親遺體辭有子二人生數歲子義曰吾兄無後天不絕吾姓二子當免於難竟棄去莫知所終

表州知府楊任

楊任浙江嘉興人初生有胡僧過之聞啼聲嘆曰此兒異日必顯終不免於刑耳任性孝嗜學洪武間由人才擢知表州府黃子澄一見以國士許之守表政多宜民北師起任引

金一
疾歸壬午子澄出徵兵往約蘇州知府姚善
航海善不可乃至任家與任謀求舊君以圖
大舉事泄俱被擒至京磔于市任子禮坐死
籍產族誅

蘇州知府姚善

姚善字克一湖廣安陸人初姓李志行淳實
學識高遠爲諸生時扁讀書所曰待旦軒工
詩與會稽唐之淳相唱和洪武中由鄉舉歷
祁門丞同知廬州重慶所至有能聲三十年

擢知蘇州府初

太祖以吳承元俗僭靡違式繩以重法囂訟者更持短長訟蜂起難治善洞曉政體諳悉人情弛張寬密各協時宜數造請郡賢考求治道商略民生休戚俗尚淳漓稍因俗救正吏民回嚮轉稱大治爲列郡最隱者王賓獨居陋巷善躬往候見舍車步入叩門賓問爲誰對曰姚善乃開門延語及賓報謁望門再拜而返善自邀還辭非公事不敢入又將候韓

奕奕避入太湖善歎曰韓先生所謂名可聞而面不可見者耶有錢芹自守甚高善初願見不可得會俞貞木以明經見重於善月朔望必延致學宮講經書訓士一日饋菜于貞木誤致芹所芹受之吏覺其誤詣貞木以告貞木曰錢先生不苟取予今受不辭必仰府公之賢耳善喜訝欲往候使人先道意芹對使者曰芹誠幸見公然芹民也禮不可往見於庭若明公弘下士之風請俟月朔胥會于

學宮善如期至迎芹坐上坐延質經義芹曰
此士子之業公今事有急於此者善益竦然
請問之芹但出一簡授善竟不交言而去視
之則皆戰守制勝之策也善心嘉之時靖難
兵已南徇善于是密結鎮常嘉松四郡守訓
練民兵相約勤王而薦芹爲行軍司馬善尋
至京師畫策防禦又從大將軍北行旋還京
建文君用漢破七國策貶齊黃於外善言于
朝曰人有文武才略可扶顛濟危者反置散

地不用今事已狼狽急須召之詢其名曰今
人才孰有過於黃大卿者乃召還二人未及
至而金川門失守矣是時善奉詔還兼督蘇
松嘉常鎮五郡兵勤王未及戰

文皇卽位索子澄甚急子澄走蘇約善共航海
舉兵善謝曰公可去善不可去公朝臣可四
往號召圖興復善職守土義當與城存亡子
澄遂去善爲麾下許千戶等縛見

文皇詰善曰若一郡守乃敢舉兵抗我耶善厲

聲不遜死之時年四十三子節發戍賀縣千
戶所幼子繼兒蘇州坐配保兒習匠正德中
巡撫秦金祀之鄉賢祠

徽州知府陳彥回

陳彥回字士淵福建莆田人父立誠洪武間
歷仕州縣後以非辜陷重辟彥回與弟彥困
一作國俱捕逮一戍雲南一戍遼東彥回未入
滇大父與母及子俱道死比至蜀惟祖母郭
僅存會赦又弗原監送者憐彥回縱之去顧

貧不能歸聞邑人黃積良知定遠縣往依之
因變姓名曰黃禮積良罷依閬中縣丞于仲
和後閬中教諭嚴德政知其才以明經薦爲
保寧府學訓導三考至京承顧問陞平江知
縣閬十三年

高廟崩彥回入臨給事中楊惟康薦其文學廉
幹建文君召見西角門陞徽州知府數月政
教一新士民感悅以循良蒙上賞會丁祖母
郭氏憂徽父老走京乞畱是時彥回尚蒙賞

姓居恒以亡命冒宗爲愧屢欲陳首輒自籌
曰祖母年高萬一蹉跌托之何所隱忍二十
餘年至是衰經赴闕疏其故乞正名籍有旨
釋彥困遼東戍仍從徽民前請畱郡治事彥
回又乞竟服不允而許襄事供職彥回乃葬
郭郡北十里北山之陽彥回視事時走墓下
哭甚哀徽人名其山爲太守山靖難師起彥
回奉命募義勇至京師適彥回至自遼東邂
逅旅邸悲喜交集郡士曹從善往賀彥回謂

之曰予荷朝廷再造之恩此生不足報萬一
予固有以處之矣到郡當遣吾弟歸治家事
予身許國他不卹也未幾北軍渡江彥回糾
義勇赴援內難已靖擒械至京不屈棄市籍
其家

徽州知府黃希范

黃希范不知何許人代陳彥回爲徽州知府
政令嚴明士民信服靖難兵起大修武備金
川門失守素服不治事後坐與長史程通善

嘗共議條上防禦策捕至不屈死籍其家

知府葉惠仲

葉惠仲浙江臨海人與兄夷仲並有文名稱
二葉惠仲初任廣武衛知事陞知縣建文初
以知縣充史官修

高廟實錄尋陞某府知府永樂初坐修實錄時
書靖難事爲逆論死籍其家

寧波知府王璉

王璉字器之山東日照人學通經史尤長于

春秋洪武初仕教授以累謫遠方洪武末以
賢能薦授寧波知府清儉律已平易近民杜
私謁革吏弊政教兼舉其自奉甚約一日見
饌兼魚肉大怒命撤而瘞之號埋羹太守尤
痛繩武人之不法者故軍衛甚銜之建文末
北師乘勝日迫江上璉造船取海道勤王爲
軍衛吏縛送京師

文皇問曰造船何爲璉徐對曰將由海道趨爪
州截來路耳

文皇亦不怒釋之放還田里

衛輝知府孫鎮

孫鎮廬州合肥人洪武中中制科除戶部主事時以課程事罪本部官鎮諫不宜連坐謫戍雲南尋復其官擢衛輝知府靖難兵至抗節不附謫戍山海二十餘年宣德初薦起爲上饒縣丞不受自號沖玄子

常州府同知石允常

石允常字恒德浙江寧海人洪武甲戌進士

歷官河南按察司僉事廉介有聲人稱石清
潭分巡某道微行民間聞哭聲甚悲允常廉
知其女爲閹宦逼奸而死受其訴聞於朝捕
宦抵大辟羣宦銜之巧搆允常左遷常州府
同知俄北師起允常棄官歸

文皇卽位追論建文間廢毀周府官僚事逮至
者五十餘人允常與焉衆悉洵懼服罪人止
贖米五十石獨允常鍛鍊百端堅不肯服繫
獄二年免死謫戍中屯衛躬擐甲胄幾三十

年年七十代還過南畿感愴病卒于舟中

松江府同知某

松江同知失其姓名亦不知何許人勤王詔
下同知榜募義勇入援并言靖難之兵乖恩
違義極肆指斥

文皇卽位械至京不屈磔於市

賓州知州蔡運

蔡運江西南康人洪武中以貢士歷官四川
參政清勁直諒不諧於俗尋罷歸建文中復

起賓州知州有惠政靖難後以奸黨論死百姓憐而思之

沛縣知縣顏伯瑋

附子有為

顏伯瑋名瓌以字行江西廬陵人唐魯公真卿之後聰敏介直能文章洪武末舉賢良除知徐州沛縣俄而靖難兵起所過郡縣皆歸附伯瑋聞之獨以死自誓時李景隆統兵往禦駐德州伯瑋率淮北數縣民夫餽運措畫有方未嘗缺乏而民不告勞辛巳六月北兵

掠濟寧游兵過沛沛人竄匿伯瑋設法招徠
之會設豐沛軍民指揮司集民兵五千人築
堡備禦伯瑋躬自教閱時加激厲皆爲精兵
尋調三千人益德州兵壬午正月北兵駐沙
河二十二日轉攻沛伯瑋遣縣丞胡先百戶
徐彥莊間行至徐告急援兵不至度不能支
預令其弟珏子有爲還曰汝歸白大人吾不
能盡子職矣因題詩御史行臺壁曰太守諸
公鑒此情只因國難不能平丹心不改人臣

節青史誰書縣令名一木豈能支大厦三軍
空擬築長城吾徒雖死終無憾望采民艱達
聖明夜二鼓靖難兵入東門指揮王顯迎降
伯瑋冠帶升堂南向慟哭拜曰臣無能報國
遂自經死時年五十其子有爲不忍去復還
見父死遂自刎以從珏脫走濟寧逾月還沛
詢邑人知縣丞胡先已收葬伯瑋父子于沛
南關外乃至徐告伯瑋友人晏璧璧與伯瑋
同郡宦於徐因爲伯瑋傳其事言伯瑋善事

父母友於兄弟睦於族婣鄉黨稱其六行無異詞以故守令知而薦之及爲沛令數以事至徐又同督運德州每連牀共食談誦慷慨練達機宜深喜鄉郡之有人屬縣之得賢長吏也古語云謀人之軍師敗則死之謀人之邦國危則亡之若伯瑋寄百里之命素志已定視死如歸賢於人遠矣正統中御史彭勗至沛問伯瑋葬處令有司起墳立祠祀之

獻縣知縣向朴

向朴字遵博浙江慈谿人宗慈湖之學行務
實踐力學養親洪武二十五年命督府都事
張允直訪求人才以朴應詔授獻縣知縣值
兵荒之後朴闢荆榛教民農桑流移復歸北
兵南徇獻無城又當兵衝朴集民兵以忠義
激之爲保障計城破懷印綬自盡死民哀之
相與拾遺骸葬道左嘉靖間祀朴鄉賢祠

蕭縣知縣鄭恕

鄭恕字本忠浙江仙居人治尚書能賦詩好

古博雅家甚貧金甌生塵一毫不妄取蕭然
斗室日與學徒數十人講論經理高風勁節
一時傾嚮之寧波知府禮聘爲昌國縣訓導
尋陞知蕭縣甚得民心建文四年靖難支將
王聰攻破蕭恕不屈死之後籍其家二女當
配亦死之子濂湜姪溫汲謫北平種田或曰
恕嘗有平幽燕疏歸起義兵時無應者遂往
就戮蓋事定加刑也台州祀恕于八忠祠邑
祠祀恕及其二女

樂平知縣張彥方

張彥方江西龍泉人建文初由給事中以便
養告改樂平知縣靖難兵起勤王詔下彥方
糾義起兵一邑響應有武弁沮之彥方大哭
曰君父在水火吾可以自緩乎遂率所部抵
江口遇靖難游兵執至樂平梟首暴屍譙樓
時暑月經旬顏面如玉無一蠅集人謂忠義
所感父老竊葬縣治之清白堂後

漳州府學教授陳思賢

附生員

伍性原

林

曾廷瑞

陳應宗

鄒君默

呂賢

陳思賢廣東茂名人質直好義洪武末爲漳州府學教授以忠孝行誼勗諸士隨才造之多所成就

文皇靖難詔至思賢慟哭曰明倫之義正在今日遂堅卧不出迎率其徒伍性原陳應宗林珏鄒君默曾廷瑞呂賢卽明倫堂爲舊君位哭臨如禮郡人執送京師思賢死之六生咸以身殉嘉靖中提學副使邵銳立祠祀之

濟陽縣學教諭王省

附子禎

王省字子職江西吉水人洪武五年領鄉薦至京詔免會試命吏部次第擢用省以親老乞歸養尋以文學徵

太祖親試稱旨當殊擢省自陳才薄親老乞便養得浮梁教諭丁艱起復改睢陽凡八年又改濟陽靖難兵至省爲游兵所執從容引譬詞義慷慨衆舍省省歸坐明倫堂伐鼓聚諸生謂曰若等知此堂何爲名明倫今且勿多

論只說君臣之義何如遂大哭諸生亦哭省
以頭觸柱死女適邑人周鳳岐從之官卽墨
簿聞靖難兵至濟陽女逆知父必死泣曰吾
父必不生矣請于夫遣人往凡三往竟得其
遺骸歸葬後有司祀之學宮子禎爲夔州通
判亦抗節死云

沛縣主簿唐子清

唐子清沛縣主簿也不知何許人在沛有善
政民愛之知縣顏伯瑋令沛專調兵食之

邏察事皆付子清靖難兵執子清欲殺之將
兵者欲且畱子清曰吾願從顏令於地下死
之

東平州吏目鄭華

鄭華字思孝浙江臨海人洪武丁丑進士初
授行人奉使川廣有令名建文中註誤謫東
平州吏目或曰判官靖難兵起謂其妻蕭曰
吾義必死柰親老汝少何妻泣對曰君能爲
國妾獨不能爲君乎華乃稱疾尋醫携家托

其友無錫丞趙次進馳還東平時州長貳盡
棄城走華獨率吏民死守憂勞病甚水漿不
入口者三四日北將朱能攻陷東阿分兵取
東平華曰守土之臣義不苟生請援山東
不至乃力疾戰不屈死之時年甫三十台州
祀華於八忠祠

沛縣典史黃謙

黃謙亦不知何許人以儒生爲沛典史果敢
能戢下知縣顏伯瑋禮遇之益効力盡職靖

難兵欲執至徐招降謙感顏知己願與同死
死之

永清縣攝縣事典史周縉

周縉字伯紳湖廣武昌人洪武中以貢入太
學初授永清典史居官廉謹攝令事捕蝗弭
盜俄而靖難兵起一時守令多相率迎降永
清地尤近燕縉極力爲拒守計顧其民寡弱
爭先逃散縉度不可爲懷印南奔將他圖焉
道聞母喪還家以禮葬畢卽出糾義旅勤王

戰艦戎器略具則聞南師熾而天命去矣縉
乃走匿民間已而蹤跡漸露有司卽其家捕
獲械送京師縉自分必死慷慨就行至則朝
廷特下之獄久之謫戍興州居數年子代還
屏迹田園年八十而終吳文定寬爲縉傳有
曰以愧世之爲丁公而倖免者是時吏部言
前北平屬州縣官朱寧等二百九十人當
皇上靖難時俱棄職遠避宜寘法典俱逮戍縉
其一也寧等不可攷矣

進士陳周

陳周不知何許人建文中第進士其先世與吳僧道衍善衍幸用于

文皇帝因薦辟之周乃遜隱錫山終其身不仕
應天舉人劉政

劉政字仲理蘇州長洲人穎敏力學平生以忠義自許建文元年舉應天鄉試第一時考官方孝孺試題出托孤寄命章得政卷喜曰此他日臨大節而不可奪者乃百鳥中之孤

鳳吾當虛左以處之明年試禮部下第建文君遜位孝孺被戮政悲忿不食而死

濟陽縣歲貢生高賢寧

高賢寧山東濟陽儒學諸生受學於教諭王省建文中貢爲國子生靖難兵攻濟南不下以箭射書城中使亟降賢寧時在城中作周公輔成王論射城外請罷兵靖難後被執

文皇曰此作論秀才耶秀才好人命官之賢寧固辭其友紀綱時爲錦衣指揮方倖用事勸

賢寧就職賢寧拒不聽曰君以軍旅發身余
本書生食廩有年於義不可綱言於上全其
志而遣之歸年九十七卒

忠節錄卷之四

都督廖鏞

廖鏞無爲州巢縣人祖永忠開國功封德慶侯父權嗣封鏞以適子任散騎舍人歷官至都督建文中與議兵事時宿殿庭靖難後

文皇以廖侯兩子鏞與銘嘗受學方孝孺令召之孝孺怒曰汝讀幾年書還不識箇是字兩子復命

文皇大怒令收孝孺刑之聚寶門外凡七日罵

聲不絕廖兩子拾遺骸葬聚寶門外山上甫
畢而廖氏亦見收兩子逃去永樂元年四月
錦衣衛鎮撫司奏獲鏞銘送刑部論死鏞弟
鉞及從父淮安指揮僉事昇俱謫戍邊鏞母
東甌王長女也并銘女送浣衣局

守居庸關都督余瑱

余瑱北平衛指揮使建文時歷官都督初與
謝貴密謀不遂貴死瑱走保居庸關時宋忠
承制令瑱守之瑱簡練關卒得數千人將進

攻北平

文皇曰居庸險隘北平之咽喉瑱若據此則拊我背宜急取之緩則增兵繕守後難圖矣遂專力擊瑱瑱且戰且守援兵不至棄關走懷來依忠忠又敗北兵給曰石頭城亦破矣瑱曰石頭城便破吾亦不舍懷來力盡被執不屈而死

中軍都督府都督同知陳質

陳質不知何許人歷官江西都指揮使有威

名建文初充叅將守大同尋陞中府都督同知發代府陰事代簡王獲罪靖難兵出懷來質以西師助宋忠忠敗退守大同靖難後被執不屈

文皇曰質奸人害代王者遂誅質

鳳陽守將都督同知孫岳

孫岳洪武中從大將立功官至都督同知建文中充鳳陽守將靖難兵起大脩戰守器械撤寺材爲戰艦樓櫓戈甲咸有法式列寨淮

西水陸有備靖難兵竟從下流渡淮至盱眙
及金川門不守岳猶堅守中都永樂元年法
司劾岳逮至京安置海南死

前軍都督府都督僉事耿璫

耿璫長興侯炳文仲子官至後軍都督僉事
靖難兵起與江陰侯吳高及楊文率遼東兵
圍永平不克退保山海關吳高被間奪兵徙
廣西楊文守遼東璫數請攻永平以動北平
文不聽靖難後璫論死

副總兵都指揮使瞿能

瞿能不知何許人驍勇有名洪武中以四川都指揮使與同知徐凱統兵從涼國公藍玉渡大渡河擊西番有功又與都督徐司馬爲副總兵從都督聶緯討建昌叛酋月魯帖木兒又副藍玉破賊雙狼塞建文君卽位從李景隆爲裨將攻北平能力戰勢甚銳與其子帥精騎千餘殺入張掖門景隆忌之不令速進以故北平得爲備白溝河之戰能奮勇衝

擊殺傷甚衆北平兵遂却渡河能及其子與
北將房寬接戰寬敗

文皇馬阻于隄幾爲能所及得高煦兵合又會
大風起南師陣動諸將皆狼狽走獨能父子
力戰死之精兵萬餘人皆沒無一還者

錦衣衛都指揮使宋忠

宋忠錦衣衛指揮使智勇有名洪武二十九
年百戶有論死非其罪者忠疏救之御史劾
忠

太祖曰忠率直無隱爲人請命何罪爲并宥百
戶戍邊三十年御史劉觀劾忠作威福邀名
譽調鳳陽中衛明年平羗將軍都指揮齊讓
討西夷無功以忠爲叅將從征虜前將軍楊
文討之凱旋復官錦衣建文初勅忠以都指
揮總邊兵三萬屯開平盡簡燕府護衛壯士
從忠聽忠節制又以都督徐凱屯臨清耿獻
屯山海與忠相犄角且約張昺謝貴葛誠爲
內應及昺等遇害靖難兵起敗居庸關守將

余瑱據其城忠率所部至居庸關不敢進退保懷來

文皇謂諸將曰宋忠擁重兵懷來必爭居庸宜乘其未至先擊之諸將皆曰敵衆我寡難與爭鋒宜固守以待其至

文皇曰此非爾等所知當以智勝難以力攻統精兵八千卷甲倍道趨懷來先是獲諜言忠激諸將士云爾等家在北平者並爲所滅盡努力復家讐報國恩

文皇急令其家人張故旗幟

子兄弟相勞問無恙諸將亨

罵宋統兵欺我遂倒戈走忠命

文皇一麾渡河鼓譟而進忠敗死之子

衛指揮後謫戍邊尋賜死

守薊州都指揮馬宣

附鎮撫
曾濬

馬宣不知何許人建文初爲都指揮守薊州
靖難師起宣謀起兵迎拒已而張玉朱能來
戰宣與鎮撫曾濬閉城堅守

文皇遣將反復諭之不下玉擁衆急攻宣率衆出戰玉遣精銳衝入其陣宣戰沒濬亦死之或云宣被執罵不絕口死

北平都指揮使謝貴

謝貴未詳始所自起洪武二十五年以錦衣指揮僉事陞河南都指揮僉事署山西行都司事二十八年坐趙隆事法當死

太祖宥之降河南衛指揮僉事建文君卽位慮北平有變兵部尚書齊泰薦貴智勇以爲北

平都指揮使俾覘燕動靜令其練兵卽有事
先發後聞巳卯六月貴部署七衛兵布城中
迫王城外墻以木柵斷端禮四門

文皇命指揮張玉朱能等帥護衛勇士爲之備
能請先擒謝貴張昇

文皇曰彼防守旣嚴猝亦難擒須以計致之今
奸臣遣中人來逮護衛官屬宜悉依所坐名
收之就令中人召貴昇付所逮者則貴昇必
來來則縛之一夫力耳乃匿壯士端禮門內

遣召貴昺久之乃至衛從甚衆門者呵止之
惟貴昺得入至端禮門壯士出擒之將士移
時乃知皆散走玉等率勇士捕之是夜攻九
門已克其八惟西直門未下指揮唐雲單騎
往諭守者散乃盡克九門于是上書清君側
之惡而靖難之師起矣貴等卽日被難

北平都指揮彭二

彭二亦未詳始所自起建文時爲北平都指
揮有威名靖難兵起殺謝貴彭二咤曰早不

爲我謀急躍馬大呼市中集兵得千餘人欲
直入端禮門

文皇遣健卒格殺之兵亦散

北平都指揮彭聚

彭聚北平都指揮也與孫太副宋忠守懷來
忠敗聚力戰死當是時諸將校爲靖難兵所
俘者百餘人皆不肯降以死大半不可考矣
北平都指揮孫太

孫太都指揮從宋忠戰懷來先登頗有斬獲

靖難兵擇善射者並射太中矢流血被甲慄
慨裹血力戰奮呼陷陣死之

西涼都指揮莊得

一作德

莊得洪武末爲西涼都指揮召至北平爲燕
兵右翼出塞有功建文初隸宋忠麾下懷來
之戰惟得一軍獨全後歷城侯盛庸與北師
戰于夾河得奮力助庸斬大將譚淵已而北
師以勁騎乘暮掩擊得力戰而死

北平都指揮使楚智

楚智不知何許人洪武中稱驍將數出塞有功歷陞都指揮使建文初守北平尋召還從李景隆統騎兵遇北師輒奮力戰夾河之役死于陣

都指揮張皂旗

張皂旗者逸其名不知何許人建文時以都指揮克偏將力能挽千斤每遇北兵輒揮皂旗先登軍中呼爲皂旗張轉戰山東屢有俘馘至夾河力戰死猶執皂旗不仆北軍皆異

之

行都司都指揮朱鑑

朱鑑北平行都司都指揮守大寧北兵至大寧諸將陳亨房寬皆降鑑力戰不支被縛罵不絕口死之建文君加卹典

文皇檄中所謂萬段凌遲處死者卽鑑也

大寧守將卜萬

卜萬未詳所自建文時爲大寧守將謀勇自負每戰輒先登靖難兵畏之部將陳亨欲降

畏萬不敢發

文皇乃行反間貽萬書盛稱獎萬極詆毀亨緘
識牢密名所獲大寧卒解縛厚賞之置書衣
中俾歸密與萬故使同獲卒見之怪問守者
曰彼何爲得此守者曰遣歸通密書于上都
司以故得厚賞卒跪告守者曰能爲我請得
偕行惟命是從不敢望賞守者爲請遂俱遣
而竟不與賞不得賞者終不平至卽發其事
劉貞陳亨搜卒衣得與萬書遂執萬下獄死

籍其家未幾亨竟降貞遁遼東大寧相繼不守矣

都指揮楊松

楊松不知何許人積功官都指揮北兵圍狗耿炳文使松爲先鋒據雄縣北兵圍雄松令軍士登城大罵北兵益憤破城執松不屈死之

都指揮唐禮

唐禮歷官都指揮靖難兵起盛將軍以徐凱

敗于滄洲引兵出德州營于東昌禮素稱戰
將令將騎兵殿後而以孫霖爲先鋒營滑口
靖難兵夜襲破之擒禮霖遁走

燕山護衛指揮盧振

盧振燕山護衛指揮

文皇將起兵建文君逮燕官校令昺貴密約振
爲內應昺貴旣見殺振不屈死之

指揮小馬王

王失其名每騎一小馬人遂名爲小馬王指

揮臨淮人

太祖朝功臣之子靖難師起調從李景隆行與北兵戰于白溝河敗績脫胄付其僕曰吾爲國死以此報家人乃慨然立馬豎鎗而亡

河北指揮張倫

張倫不知何許人河北諸衛指揮也勇悍負氣嘗喜觀古昔忠義事建文初薊州衛官起兵攻北平不克死倫發憤合兩衛官率兵南奔結盟報國初從李景隆已而從盛庸並有

功靖難後招倫降倫笑曰張倫將自賣爲丁
公乎死之

指揮王資

王資不知所自起以指揮從偏將防守淮北
有膂力善騎射靈璧之役率步卒護軍餉諸
將兵敗資被執遣還京復走鳳陽從徐知府
防禦靖難後追罪資不屈死之

揚州衛指揮崇剛

崇一作鄧

崇剛揚州衛指揮沉鷺有膽略靖難兵起剛

練兵繕濬城濠御史王彬倚任之兵至專以
城守事屬剛晝夜不解甲他有欲迎降者忌
剛然畏彬不敢發及彬爲張本徐政所縛開
門降並縛剛剛不屈而死

府軍右衛指揮使宋瑄

宋瑄鄆國忠順公晟之長子建文中爲府軍
右衛指揮使數從諸將禦北兵有功戰于靈
壁瑄披甲躍馬先登斬首數級已而諸營兵
敗瑄猶格鬪力盡死之靖難後晟功名大著

封西寧侯永樂中兵部上列侯子孫名乞嗣
封瑄子本晟長孫當嗣

文皇惡瑄以瑄弟琥嗣之

留守右衛指揮僉事趙諒

趙諒鄂國公外孫其母與孝康皇后兄弟也
壯勇知兵建文初以諒爲留守右衛指揮僉
事信任之諒能效職無私交未逾月靖難兵
起諒時時奉密命往來諸將軍中覺察之靖
難後諒坐廢死

衛鎮撫徐讓

徐讓爲山西布政司理問材氣磊落有口辯
應募賫書物至北平議和解兵受而不荅還
授衛鎮撫軍前差遣戰歿

衛鎮撫衛健

衛健爲山西孝義縣丞讀書達吏事膽智過
人與徐讓同應募至北平還授衛鎮撫與讓
並赴軍前差遣戰歿

錦衣衛鎮撫楊本

楊本河南中牟人或曰浙江處州人初爲太學生精于遁法建文初募才略士本應募試兵部授錦衣衛鎮撫時吳王撫軍一日本請王出觀兵及登臺見大水淼茫平階而一軍皆不見本曰此水遁也帥師北向本常持一鐵棒重三十斤臨陣馳突北兵披靡不敢前遂破之自南北交戰諸將皆敗惟本與平安有功李景隆忌本不以聞已而本約日出戰諸軍爲後繼景隆謂諸將曰今日譬之一圓

瓜我輩種熟乃爲他人採去耶竟擁兵不救
本上䟽略曰刑屬三千罪莫大于不孝人倫
有五德莫大于盡忠忘君虐民者不可以不
懲喪師失律者不可以不罪今都督袁宇與
耿炳文征討喪軍士二十萬于燕地皇上憐
其爲

太祖故舊不忍加刑又魏國公徐輝祖征燕私
存姊妹之情虧喪士馬皇上召回京師命大
教場操練軍士又曹國公李景隆四月進兵

喪失軍馬無限皇上責問乃歸罪臣下乞假
臣爲大總兵用一能官召募義勇招撫軍伍
凡先鋒叅謀軍政稽考等官臣自當保舉仍
特命親王爲監軍疾馳燕師則可免生民于
塗炭奠宗社于太山矣本遂帥孤軍獨出被
擒不屈繫北平獄後

文皇攻濟南失利趙王奔還北平恐人心搖動
索本殺之

文皇大怒以本有才略且欲用之也

燕山左護衛千戶倪諒

倪諒燕山左護衛千戶上變告府中事逮府中官校于諒周鐸等皆伏誅沒產靖難後捕諒不屈死之

錦衣所鎮撫周拱元

周拱元湖廣沅州人少讀兵書出入辰沅蠻中相交易蠻人信之建文初應募入京試騎射荅策授錦衣所鎮撫軍前差遣占候輒中主將令引步兵防餉舟靖難後不屈死之

附錄

建文數年間諸將抗禦執縛委身不貳莫考
其終者尤非一人滄洲之戰都督徐凱程暹
陳暉都指揮俞琪趙許胡原李英張傑德州
之掠千戶蘓獻濔沱河之戰指揮鄧戩東島
真定之圍都督甯忠都指揮劉璉朱榮雄
之戰都督潘忠白溝河之戰都指揮何清指
揮滕聚定州之戰都指揮花英鄭琦王恭指
揮詹忠渡涑水則指揮賈榮拔東平則指揮

詹璟拔汶上則都指揮薛鵬渦河之戰則胡
騎都指揮林帖木兒火耳炭哈三帖木兒婁
鬼里淮河之戰則守將丁良朱彬靈璧之敗
則都指揮孫晟王貴等一百八十餘人

忠節錄卷之五

盧振

盧振不知何許人亦不知何官靖難兵起與齊泰黃子澄徐輝祖輩謀畫戰守効力爲多靖難兵畏之遜國後逮至令降振厲聲不遜乃數其罪撈掠而歿夷其族按燕護衛指揮亦有盧振蓋兩盧振云

周璿

周璿山東諸城人不知何官建文初北師起

璿練兵給餉爲戰守計夙夜不懈靖難後不
屈死之妻王子蠻兒皆沒官或曰璿以神策
衛經歷言事擢僉都御史後論死

牛景先

牛景先不知何許人亦未詳何官禦靖難兵
數有功金川門失守景先變姓名易服出走
歿蕭寺中已而窮治齊黃獄逮景先妻妾發
教坊司

馬坤

馬坤不知何許人亦不知何官靖難後不屈死

梁良用

梁良用者浙江定海人父子兄弟八人俱事建文君靖難後相率變姓名避去良用去爲舟師已而死於水或曰梁氏八人赴水歿者五存者三

郭良

郭良不知何許人亦不知何官靖難後與梁

中節相約棄官爲道士去

梁中節

梁中節浙江定海人未詳仕何官少好讀老子道德經靖難後與郭良棄官同走出京城爲道士入山去

何洲

何洲海州人不知仕何官與宋和郭節友善素以忠義相勗靖難後遂相約棄官爲竺人客死異域竟莫識其姓名

燕山衛卒儲福附妻范氏

儲福常州無錫縣人洪武初隸燕山衛籍年二十餘頗好義靖難兵起福感憤挈母妻逃去文皇卽位詔族購戍卒入伍至燕山福在錄中調曲靖衛復挈家行因仰天哭曰吾雖一介賤卒義不爲從逆之臣在舟中日夜號泣不輟竟不食而歿母韓妻范爲營地葬之范時年二十有姿色居貧奉姑甚謹每哭其夫則走山谷中大號不欲聞之姑也官有

聞其寡者欲委禽焉旣而諗其事曰此節孝婦也我安忍犯之一日范往澗水邊浣衣見其傍艸生若蘇席艸因取之織席售以養姑姑年七十餘終范管葬爲廬于墓傍亦八十餘卒席艸遂不生土人義之卽其廬葺爲菴集尼居之爲崇孝菴

金川門守卒龔翊

龔翊字大章蘇州崑山人居金陵年十七爲金川門守卒靖難兵首入金川門翊不能拒

大哭還鄉隱居教授宣德間巡撫周忱兩薦
爲崑山太倉學官翊謝不就曰翊仕無害於
義恐負往日城門一慟耳竟隱終身門人私
謚爲安節先生

馮翁

馮翁不知何許人在夔州以章句教童子給
衣食能爲對句及古詩詩輒自題馬二字或
馬公或塞馬先生嘗作詩大書壁間曰夜夢
何奇特龍飛天漢津朝橫滄海曲夕過滇池

濱光雯皆五色蜿蜒無損鱗淵田變化間張
主藉高旻比見補鍋匠歸卽刻去時蓋永樂
甲申乙酉間未幾辭主人去莫知其所終

王公

王公名籍不傳永樂初突來金華東陽縣東
山不言姓名惟披麻戴笠終身不易服號曰
性天然又曰大呆子時爲王姓人題詩曰宗
兄故知其姓卒歿於東山

雪菴和尚

和尚自名暨號雪菴不知其姓亦不知何官
何許人靖難初方黃之獄殺幾萬人謫戍窮
邊死於道死於邊者又幾萬人當是時和尚
方壯年慟哭落髮爲僧西南走重慶重慶大
竹善慶里山水奇絕可廬和尚又走善慶里
里中有隱士杜景賢者知和尚非常人與之
遊往來白龍諸山山旁有松柏灘灘水清駛
蘿篁森蔚和尚欲畱居之景賢豪有力乃爲
之寺寺成和尚率其徒數人入居昕夕誦經

山中入謂且誦佛經乃不知其誦易乾卦也
景賢意和尚不宜誦儒書恐有蹤跡然又不
肯顯言言則恐和尚他去以故婉解之曰和
尚釋也而誦儒乎請誦佛經和尚亦喻景賢
意遂置儒經不誦誦觀音經寺因名觀音焉
和尚又時時買楚詞袖之登小舟急棹灘中
朗讀一葉輒投一葉於水投已輒哭哭已又
讀終卷乃已衆莫測其故景賢心知之然亦
不問和尚和尚雅嗜酒日注酒一壺俟客客

至輒飲客不至雖樵夫牧豎亦拉之入飲飲
半酺呼兒童歌曰我歌爾和歌竟瞑焉而寐
和尚頎形秀爽指柔白剪剪落筆成章詞不
甚工密然意氣渙發能感愴人竟秘迹以灰
死之日其徒問曰師卽死宜銘何許人和尚
瞪目曰松陽問其姓名終不答遺詩若干篇
後百二十餘年可貞子刻之然亦未敢顯行
於世或曰和尚爲葉希賢浙江松陽人國初
舉賢良任監察御史改授翰林學士建文壬

金 卷三
午六月之變家人驚潰相失疑其已死發喪
以衣冠歸葬希賢實從嗣君出亡隱姓名削
髮爲僧云

雲門寺僧

僧姓名不傳永樂時栖會稽雲門寺每從一
童子携茗具筆泛舟而遊賦詩滿袖歸則焚
之不言所以人謂是建文時臣出亡晦迹者
東湖樵夫

東湖樵夫樵浙東臨海縣東湖上日負薪入

市口不二價建文壬午秋詔至臨海湖上人
相率走縣庭聽宣讀或歸語樵夫曰新皇帝
登極樵夫愕然曰皇帝安在或曰燒宮自焚
矣樵夫痛哭遂投湖水中死竟不知何許人

耶溪樵夫

樵夫于永樂時樵會稽之耶溪上日鬻薪二
束足食則已食已畫詩於溪沙畫已輒亂其
沙人怪之一日窺其畫從後抱持之乃識其
詩云夢入鵝班覲紫宸覺來依舊泣孤臣半

生家國惟餘我萬里江山已屬人無地可容
王蠋虎有薇堪濟伯夷貧伶仃苟活緣何事
要了熒熒一點真尋匿去不知其姓名亦不
知其所終

河西傭

河西傭不知何許人建文四年六月遜國後
傭被葛衣走是冬至金城行乞市中金城邊
地極寒傭止衣葛明年過河西依莊浪豪魯
家爲傭取直稍稍積買羊裘披之必覆之故

葛衣夏或衣暑布布卽新故葛衣仍覆其上
後葛益故縷縷竟不肯脫人勸之棄置悶悶
不答傭錢稍餘走市中買牛肉酒招諸乞兒
飲傭作倦時每自吟哦常夜聞其哭泣聲永
樂中有畱都官從宋總兵至莊浪識傭欲呼
與語傭走南山中避旬月畱都官去乃還有
問畱都官傭何人官亦不答在莊浪數年病
且歿呼主人謝囑曰我死勿殮我棺幸西北
風大起火我颺我灰無埋我骨魯家從其言

川中補鍋匠

補鍋匠不知何許人往來夔慶間帕首挂短衣爲人補鍋至州邑不過三日卽去去或復來人有欲學補鍋者授之不索謝錢但令肩其擔以從後學者至卽遣先學者去如是數年川中人識之皆呼爲老鍋匠補鍋或與錢布米不擇當食時與之食卽不復索錢錢稍積囊中遇風雨寒暑不出卽買酒飯自飲食常寄宿蕭寺一日忽夔州市中逢馮翁者二

人相顧愕然已而相持哭哭已相牽入山岩
中坐語竟日學補鍋者屏不得聞語已又相
持哭且別去言今永訣不可復相見已後補
鍋者業暇偶值三數詩老酌酒聯句立於側
怪其語澁而艱輒然者再諸老怒曰汝能詩
卽續吾詩指韵而應諸老驚起延之上坐請
賦席上獅頭柑強而後可過此若病風然卒
晦以灰莫知其所終人或言其與雪菴和尚
故僚友矢死不相問訊云

忠節錄卷之六

附考誤

一

建文之出奔王文恪陸文裕鄭端簡俱詳載其事以爲天順中出自滇南呼寺僧曰我朱允炆也胡濙名訪張儼健其實爲我衆聞之大驚以聞

詔傳送入朝衆無識者僧曰固也有中官吳誠者俾驗之亦不識曰吾賜汝肉汝兩手俱有

所執伏于地而口取之記否誠始拜而哭命
居大內以壽終葬西山不封不樹而史不及
之豈有所諱耶薛應旂憲章錄則言正統十
二年廣西思恩州獲異僧陞州爲府土官岑
瑛爲知府瑛初遇老僧于道從者呵之不避
詰其度牒乃楊應能也曰此非吾姓名吾有
所托而逝者汝不聞金川門之事乎云云瑛
大驚送之京師使尚膳太監吳亮識之其說
亦如諸公攷之史第云正統五年有

十餘自雲南至廣西給人曰我建文也張天
師言我四十年苦今滿矣宜亟返邦國命其
徒清進特詣思恩府土官知府岑瑛執送總
兵柳溥械至京會官鞠之乃言其姓名爲楊
行祥釣州白沙里人洪武十七年度爲僧歷
遊兩京雲貴至廣西

上命錮之錦衣獄四月而死同謀僧十二人俱
戍邊衛此事與應旂所紀相近然應旂實借
此而附會前說耳其人乃楊行祥非楊應能

也建文以洪武十年生距正統五年當六十四耳不應九十餘也是時

英宗少三楊皆其故臣豈皆不能識而僅一吳誠識之識之又何忍下之獄而死戍其同謀十二人也且事發于正統五年非十一年也思恩故府未聞某年陞州爲府野史又載建文詩三首恐皆好事者附會語也大抵建文出亡與否不可知僧臘已深當滅跡以終未必肯出所以有此紛紛者止因楊行祥一事

誤耳

二

枝山野記言

張太后大漸召三楊于榻前問朝廷尚有何大事未辦者士奇首對有三事其一建文君雖已滅曾臨御四年當命史官脩其一朝實錄仍用建文之號

后曰曆日已革除之豈可復用對曰曆日行于一時萬世信史豈可蒙洪武之年以亂實

后納之或曰請謚爲神聖皇帝其二云云

后亦首肯其三方孝孺已誅

文皇帝詔收其片言一字論死乞弛其禁聽令
存而傳之

后默然未荅三楊卽趨下叩頭臣等已受顧命
遂出而憲章錄亦因之按

張太后遺詔今存未聞有此三事也卽有之實
錄何以不書以失國之君加神聖之謚尤爲
不倫且孝孺集成化時始出

遜志死節事至今二百年人皆歷歷能言之
其成仁取義之死靡悔斷然不可磨滅而同
時文學柄用之臣欲自飾其非爲史肆以醜
言詆之是可恨也故彭惠安公韶過江南題
詠有云神考早謝世太孫推正適嫌隙日以
開讒言肆罔極居然尾不掉大都勢偶國時
有黃奉常輕佻故無匹蹤跡類叔文論事時
造膝一旦削侯王匆惶何太忽細人暗大體
國釁此焉隙漁陽動地來六軍盡股慄齊公

爲司馬折衝乃其職內相方夫子樞機資密
勿又有黃門陳自少稱英特之死矢靡他鼎
鑊甘如蜜所貴賢士模萬死奚足恤後來奸
佞儒巧言自粉飾叩頭乞餘生無乃非直筆
聖人順天命四海瞻堯日爾胡守戇愚甘心
取族滅不觀解與胡乘時附鳳翼恩寵日日
加聲名垂簡冊方之大節不待此而明輒附
載之

開國功臣錄及革除遺事皆載長興侯耿炳
文歿于戰陣與吾學編稍異功臣錄乃定遠
黃金所輯金與炳文爲同鄉其考據必核吾
學編當是傳聞之誤耳

五

吉安志北師薄都城羣臣多往迎附王良獨
闔門痛哭與妻子訣曰吾不復生矣安能顧
若等哉遂自醵死別記良以辛巳九月卒帝
遣禮部侍中黃觀諭祭非也恐良家畏及追

金
戮故遷就於日月之間以避之吳康齋述所
目覩可據

六

西樵野記言張統少有學行尚氣節國初以
人材赴京師初授部職建文時尋陞廣東布
政使後

太宗登極召回謂妻子曰吾荷

先帝之遇起自草野一旦至此今大事已去惟
一死可報國耳卽沐浴大慟投鍾山下龍潭

而死有妻一妾二男女四見張死義亦隨投
之繼以婢僕數人慟哭云人而無義不死何
爲吾主公輩皆爲國亡予等獨不爲主人死
乎悉把臂並投于淵以死按統以建文元年
入爲吏部尚書此云太宗召回非也喬世寧
作耀州志備載統於

成祖卽位時自縊於吏部後堂以死絕無投淵
之說且言有子三人敵豆簠後敵舉懷材仕
爲四川按察司經歷相隨入水之事亦未嘗

有喬爲張鄉人言必有據野記真野人語耳

七

谷府左長史劉璟傳邑人陳中州撰謂

高帝授璟爲閣門使金書除奸摘佞四字于鐵簡賜之令擊百官不法者後遷谷府長史提調肅遼慶寧燕趙六府事鄭端簡公亦因而筆之書吾謂此真齊東野人語中州青田人誇大誠意伯家事而附會之耳金書鐵簡此優人彈唱宋八大王事也

高帝豈以鐵簡賜閣門使至谷府長史一小府
佐豈有提調六府之理肅府在甘肅慶府在
寧夏秦王在西安韓王在平涼未就國安能
遙制洪武間趙王杞甫封卽逝時無趙府趙
府文皇第三子也不意端簡之博洽而亦舛
誤至此

八

鄭應旂革朝遺忠傳言劉璉任江西叅政聞
內變集兵往救之以死自誓卒死之人謂忠

烈可並方孝孺按璉爲叅政洪武十二年已
前死未及靖難事也蘇平仲集有璉墓誌銘
可證應旂當爲影撰語

九

閒中今古錄言

祖訓條章云後代不許設丞相革除年間又設
左丞相齊太右丞相黃子澄故靖難後定其
罪名曰齊黃黨惡是也按齊以兵部尚書黃
以太常卿預機政謀削諸王當時何嘗有左

右丞相靖難檄止稱齊黃黨惡亦不言左右丞相也

十

李文達天順日錄記鐵鼎石死義甚烈二公皆鄧人也故能知之王文恪紀聞謂公死後二女入教坊數月終不受辱有鐵同官至二女爲詩首章所謂今日相逢白司馬尊前重與訴琵琶不知同官者何人乃敢以此語聞上乎第二章所謂春來雨露深如海嫁得劉

郎勝阮郎亦似已嫁後詩也按立齋閒錄云
公於三十五年十月十七日遇害子福安發
河池千戶所充軍父仲名年八十三與母薛
安置河南一女四歲發教坊似與文恪少異
二詩或出好事者之口亦未可知然當時以
鼎石非內朝臣故雖數窘

上且不屈而尚未至族誅

十一

枝山野記謂駙馬梅殷受遺詔誓劔勉強釋

兵以直言取忌忽密旨令駙馬王某募能刺
都尉者官超三級王庶知失機指揮許至發
到囚四十餘人奏報

上大悅令其俟梅早朝到竹橋擁以登舟待行
渡脚板卽掀擠其下水淺不能沒奮舟駕其
背而死大長公主入朝號慟語

太宗命卽捕許至等詰問曰汝于梅都尉何仇
對曰有旨

上怒卽命金瓜搥折其齒併其從皆斬於竹橋

以報都尉其三子皆至今世襲指揮使云按
謀殺梅殷者都督僉事譚深趙曦而發其事
者都督許成無所謂許至與王駙馬也深曦
挾私恨及窺伺有之言奉旨則誤矣

十二

顯忠錄云靖難師入索傳國寶不得或言許
尚寶已赴上游起兵矣因命執其妻翁氏并
二女配象奴奴叱取釵釧出市酒餞翁遂携
二女率家屬十人赴淮清橋溺焉有司收其

尸并二女具棺歛以待朝命不報天順中池
人至南京柳林破棺猶有存者詢之父老咸
曰此黃狀元妻女云按實錄翁夫人投通濟
門河以死非淮清橋也翁給配象奴今象房
正在通濟門外傳聞翁及二女順流至賽工
橋相持而立顏面如生烏鳶類皆不敢近久
之土人瘞於橋側此爲近之淮清橋岸舊有
青溪姑廟一妄人指爲夫人與女之遺像今
并祀黃公於其中然實非當時死所

十三

革除錄言陳敬宗於靖難初迎附按敬宗永樂甲申進士改翰林庶吉士是時陳未入官何從迎附作者之不考如此

十四

顏伯瑋傳言伯瑋死西楊學士過沛以詩悼之劉忠愍學士和其韻楊與劉同被難不死楊後登相位劉以直諫下詔獄死按劉永樂十九年進士而言與建文壬午之難真成夢

語耳且劉爲侍講亦非學士

十五

石撰平定州人靖難死節州志載撰洪武中
爲寧府左長史

太宗靖內難諸郡縣皆下江西城獨爲守備
上怒攻拔之得撰不爲屈遂支解而死此恐失
實按寧始封乃今之大寧與太宗同起兵渡
江因不之國江西之封乃在永樂中安得撰
守備江西仗節此當是約兵之日在大寧盡

節不當繫之江西

萬曆初京兆奉

上詔書建祠治城祀遜國歿事諸臣時汪公
宗伊爲表忠錄以傳然未備也海州張公朝
瑞來爲京兆丞公冰蘖之操冠絕一時於民
風士習尤所屬意論者謂公清畏人知如胡
威愛而能誨如子產真篤論也已遷大鴻臚
三載復來攝京兆捐俸錢置學田再三不勸
學宮之側造石梁貢院之前徙甃治阡築避
雨之舍種種料理悉爲經久計念遜國忠臣

義士寔繁其人手裒遺事而為此編凡增至六十餘人主成躬奉以入祠當是時公已恙也乃皇皇狀若不能以日者及薦獻如禮輿情大快詰朝而公遂歿嗚呼異哉豈諸公靈爽在天其禮有待公而成者歟公熏狀慈仁之君子至論其守則賁育不可奪有如不幸處安危之際其能爲遜國諸公無疑也然則此編之修亦其臭味然與中丞耿公定力諫議祝公世祿擬具公事行請贈謚於

朝而未果姑識於此俟采風者觀焉甲辰夏
日焦竑題